

Recenzija za knjigu:

IZBORITI SE ZA IZBOR: ŽIVOTNA PRIČA GORDANE RAJKOV

Najčešće se događa da ljudi koji prouzrokuju velike pozitivne promjene u životima drugih ljudi budu zaboravljeni, a da svi čiji su životi promijenjeni smatraju da je promjena prirodan slijed stvari ili da je morala da se desi sama od sebe.

Knjiga **“IZBORITI SE ZA IZBOR:
ŽIVOTNA PRIČA GORDANE RAJKOV”**
svjedočanstvo je međutim, da u svemu postoje
izuzeci.

Gordana Rajkov je svojim vizionarskim, predanim, djelovanjem učinila da promjene o kojima je sanjala i koje je zagovarala postanu društvena stvarnost, a da ona sama postane prepoznata kao glavni inicijator tih promjena.

Djelovanje Gordane Rajkov je svojevrsno svjedočanstvo univerzalnosti fenomena invalidnosti jer je usprkos društvenim promjenama “seizmičkih” razmjera na prostoru Balkana, invalidnost opstala kao aktuelno pitanje na dnevnom redu donosilaca političkih odluka, a u čemu je Gordanin doprinos zasigurno bio više nego značajan.

Ova je knjiga svojevrsno svjedočanstvo,

- kako uporan rad pojedinca može prouzrokovati pozitivne promjene u društvu koje se odražavaju na kvalitet života velikog broja ljudi;
- kako energija koju pojedinac uloži u iniciranje promjene odnosa društva prema pojedinim grupama ljudi može da se umnoži i pobudi djelovanje većeg broja ljudi zainteresovanih da se određene promjene dese u društvu;

- Kako fizičke mogućnosti nisu granica za najveća postignuća ako je osoba posvećena, motivisana i ima jasne ciljeve koje svojim djelovanjem želi ostvariti.

Pedeset godina aktivizma Gordane Rajkov predstavlja nemjerljiv doprinos stvaranju pokreta osoba sa invaliditetom u Jugoslaviji, stvaranje pokreta za samostalni život u Irskoj, Srbiji i Evropi.

Malo je jedna knjiga da obuhvati sve u čemu je Gordana ostavila traga zalažući se da prava i dostojanstvo osoba sa invaliditetom budu prepoznati i poštovani od strane društva.

Raspad zajedničke domovine Jugoslavije, koliko god briga za drage ljude prouzrokovao, koliko god uticao na to da se dio onoga što je Gordana sa svojim kolegama i prijateljima stvarala uruši ili izmijeni, nju nije obehtrabrio da nastavi tragati za mogućnostima uspostavljanja novih prijateljstava i načina zajedničkog djelovanja kako na prostorima bivše zajedničke domovine tako i u Evropi.

Spremnost za zajedničko djelovanje, nesebično dijeljenje znanja i iskustava, ali i otvorenost za drugo i drugačije, učinili su da Gordana Rajkov bude prepoznata i prihvaćena jednako od strane osoba sa invaliditetom, ali i izvan pokreta osoba sa invaliditetom, jednako u Srbiji i širom Evrope.

Knjiga "Izboriti se za izbor: životna priča Gordane Rajkov" svojevrsan je omaž jednom vremenu u kojem su najznačajniju pobjedu odnijele dobrotu, plemenitost i posvećenost ljudi koji su imali i imaju viziju o tome koje su promjene u društvu neophodne kako bi pojedine grupe građana – osobe sa invaliditetom – bile prepoznate kao jednako vrijedne i kojima društvo treba osigurati jednake prilike i prava kao svim svojim građanima.

Također, nepravredno malo je napisanoga o djelovanju Gordane Rajkov, ali i drugih koji su zagovarajući za prava pojedinih grupa građana dali nemjerljiv doprinos građenju humanijeg i demokratičnijeg društva dostupnog svim njegovim članovima, društva koja poštujući različitost osiguravaju da potencijali pojedinaca budu iskorišteni u svrhu napretka.

Vjerujem da je jedna od ključnih vrijednosti ove knjige poruka svim budućim aktivistima da se predanim radom usmjerenim na ostvarivanje jasno definisanih ciljeva može uticati na željene promjene odnosa zajednice prema pojedinim pitanjima i da koliko god se ponekad činilo uzaludno i teško, taj rad bude vrednovan kroz poboljšanje kvaliteta života mnogih građana, ali i za građenje društva dostupnog svim njegovim članovima i osjetljivog na potrebe različitih grupa.